

襄二縣新志卷二

山川水利橋梁附

七峯山在縣西北三十五里高八里盤踞三十餘里
山有七峯曰華峯曰太史峯曰劍峯曰鼇峯曰白雲
峯曰摩天峯曰玉女峯七峰羅列惟摩天峯最高其
脊有青石盤旋至巔遠視如龍狀故又名玉龍山石
壁有洞洞口風聲迅疾深杳莫測上建佛寺以鐵為
覆之登視者援鐵索履浮水而上下觀諸山若凌空
然中有恆嶽行宮山巖竦出風雨不侵誠天建也西

壁石鑿百梯上透山峯有玉皇聖母廟下有帝君廟
十王殿東計二里許有朝陽寺又東一里許有黃龍
洞皆峭壁險巖雖有浮橋遊人多不敢上

高家山在縣西北六十里王盛莊北

禪房山在縣西北三十里高七里盤踞四十里西連
馬什嶺四老山北連七峯山之紅沙梁月窟嶺一峯
壁立土人名丈人峯上有七級磚浮圖旁建佛寺禪
房俱遼時所建道光間重修其塔高揀雲表占雨一
如清涼塔過其地者徃徃聞木魚聲

得勝山在縣西北二十五里口名寺峪入口石巖嶄
峭山脊崎嶇又名葫蘆峪隆慶年上建元帝廟老君
廟居人鑿砌石梯數里攀援而上下有石井深不可
測

陳家峪山在縣西北二十里口內有犄腿山形如利
削相傳宋將楊業兵敗於此攷宋史潘美王侁陣於
陳家谷口趣業進戰使人登托邏臺望之在今朔州
西南寧武山上是陳家谷必附近朔州今本縣之陳
家峪距朔州西南境二百里有奇且彼時遼復取寰

州為今馬邑鄉業等自雁門師師北行戰敗引還不
當反越馬邑而北也又西北五里有圍山上有寺南
五里有小磨峪諸山俱在禪房山東南岡嶺相接
鷲毛山在縣西北十五里西通左右衛中多窰峪往
來車馬不絕口內有駱駝山又西有麻燕山斧刃山
形殊秀削

石井山在縣西十五里入口皆層巒疊嶺曲通清涼
寺南有石井故得名馬邑康貢孝義縣教諭陳國正
石井記云悟道村夾溪而居循溪西尋半里源盡而

山壁立俯視石坪有石井焉口洞圖窺之正黑非砌石非淘沙穿穴塊石三數丈泉湧如鼎怒沸汲者必續修綆而後得水然亦有徒溢井外與溪合流之時水不受物好事者以石投井隨激射而出道光丙申大邑稷井亦隨涸居民汲飲鄰村後多逢年井養如故田家不諳五行用占豐歉多奇驗緣麓北去三里許聚族百家遂以井名其村

清涼山在縣西十五里高七里許頂有磚浮圖數百里外可望見每年有白雲龍塔即雨舊有利國鐵冶

元西涼爐冶之一也北壁有石鍛土人云內有金鑽
約三寸許觸之輒動取之不出石堂有地鼓擊之聲
鑿鑿然肩有寒泉雖盛暑不敢飲下建文殊院今半
圯西北峪中有石人山峯頂石牙弩出為人形約五
六酷似衣冠供揖狀俗名石聖人

錦屏山在縣西北十五里山峯聳翠狀若列屏舊有
磁窑鐵冶西有柏山分隸大同左衛西北有香爐山
蘆子山在縣西南二十里舊有鐵冶西有牛頭嶺
小峪山在縣西南三十里上有張萬戶洞勢甚險峻

有變人咸避兵於此俗名蟒窟相傳關帝斬蟒於此
故南巖建關帝廟廟東有馬蹄遺跡其西南曰鸛鵒
峪北曰豬頭山山下出泉又有馬鬃山五指山聚象
形得名馬又有響石澗水石相激逸韻如琴同治八
年石壁塌出字跡十餘行約畧記程之語

牙余山一名紅山峪在縣西南三十五里上有捨身
崖

大峪山在縣西南四十里高五里盤曲二十餘里與
左雲四峯山連接翠峯對峙林木森鬱上有鵬窩寺

寺上險絕處有鵬巢遺跡故又名鵬峪路徑差廣可
通車行南達雁門西通紅羊峪雲西代北要通也明
明賊犯應懷每出沒於斯當時撫按議築城扼守擇
地創址竟未就緒

鷺架山在縣西南五十里張毛圪塔西北

燕家山東北距縣治六十里上有燕家洞石鐫燕洞

同

賓重修五字又西南十里曰金龍山山下有泉通馬

邑金龍池

寶峯山在縣西南九十里東連燕家山

薛家山在縣西南一百二十餘里與南寺山相對

富寨嶺在縣西南一百二十三里與西黃花嶺接連
高出群山之表雖當盛夏尚覺寒氣逼人故名

大樺嶺在富寨嶺西中多林木鄉人恆樵採於此

西黃花嶺在縣西南一百二十五里與富寨嶺相接

琉璃山在縣西南一百三十里即所里南北山之界

娘娘山在縣西南一百一十里與山陰接界上有北

嶽聖母諸廟因以得名

南寺山山中林木茂盛石徑崎嶇上千佛寺詳見

寺觀

鎮子梁西北距縣治二十里獨峙一方高里許南北亘十餘里邑之東鎮也

三臺嶺在城北三里東西亘二十里長城起伏為縣城後障

鵝毛河源發左雲老龍王山東流四十里入縣界出鵝毛口分為二北河流逕于家園東北十里過大同之霸王店復入縣境里八莊雲子坡水西北來注焉又東南三里至東作里西又五里至新發村西又東

南十里逕陳家莊入灰泉村折而東南至大同之神
嘴窩入於桑乾河

五里河即鵝毛南支東南流逕窰村西小寨距城五
里又逕家堡東泉流始旺東南流連磨道河村北
東流至半截橋北折而東南至南晏莊入小峪河

三里河發源北澗溝港汊紛歧衆流俱導逕三里莊
東南至下寨村西逕風火臺至海北頭村北沙河西
來注焉又五里至上海子村入小峪河

北沙河城北數十武昔無水今始出泉東南流逕管

家莊東又七里至海北頭入三里河

南沙河城南數十武逕七里寨北入黎家寨東南注小峪河

泥河縣西南十二里導流悟道口東流十里逕趙家莊西又東南與五龍海支流相會入磨道河村南至輝鳳坡西入宋家莊河

宋家莊河導源要集村西東南流入宋家莊又東過半截橋輝鳳坡入小峪河

鴛鴦河在縣西南二十五里二水交匯故名源發蘆

子口東南流逕宗家莊南又五里至雁頭村東入小峪河

小峪河距城二十五里導源柏山下流三十里出口逕莊頭村南過雁頭村至半截橋輝鳳坡東宗家莊河西來注焉又東五里至南晏莊東南五里河四北來注焉又逕曹四老莊南東流北折至下海子村北東南過鎮子梁會蝦兒河入於桑乾河

蝦兒河舊名薛家莊河距城三十里水山紅山峪東流逕王胡姜舖北又東過趙馬寨周家窑北又五里

入下濕莊南又三里逕馬家莊北又東北十二里
下海子村東南流逕鎮子梁會小峪河入於桑乾河
大峪河即左雲之馬頭河至盤窑村入境東南出大
峪口十里逕上希莊北又十里逕趙馬寨北又東南
逕石家莊安堡莊南又五里至清水河堡南入應州
劉霍莊東注於桑乾河其故道也邇來由清水河堡
東北逕小寨南又東北過鎮子梁會蝦兒河入於桑
乾河

清水河一名南河源出邑南四十五之韭畦付東

南流逕南埠村南又五里逕水磨村北折而東南至
應州之臧家寨入於桑乾河

新莊子河距城七十里兩源俱導一出劉晏莊貫家
溝一出南家堡圪塔灘匯入新莊子村西南流逕黃
花嶺出大于口入山陰界逕小圪塔入桑乾河攷水
經注武周塞水出故城東南流出山逕日沒城南東
有日中城又東有早起城在黃瓜阜北曲中其水又
東流注桑乾河蓋古武周塞地勢遼廓盤踞數千百
里北至大同之武周川南盡懷仁之黃花嶺北諸水

雖支派各別而均謂之武周塞水

桑乾河西北距縣治三十里邑中諸水俱匯入桑乾而過境處止黃家莊西安堡十餘里其水發源馬邑金龍池水經注謂之濕又謂之濠涇東北流左合武周塞水即新莊河入桑乾處也又東北逕白狼堆即清水河入桑乾處也又東流四十九里東逕巨魏亭北在今鎮寧梁南邑諸水皆從此入又東逕劇陽故城崞川水注之在今西安堡東南即渾河歸桑乾之處過此即隸大同

鎮子海在縣東南十五里周迴二十五里中產鯉魚
大十數觔鵝雁諸禽孕哺其間因居民決退水渠導
流於桑乾故水涸魚竭變為禾黍近多產鹽

灰泉在縣東二十里脉通黑河邊外燒荒草灰自東
湧出元大德乙巳夏懷仁地裂二所湧水盡黑漂出
松栢朽木即此泉也今灰泉村西南里許有煖泉隆
冬不凍正南有寒泉夏季水底猶有伏冰二泉寒煖
不同而水灰黑如一又寒泉之東有土阜高丈餘大
畝許掘三數尺便得泉味甚甘冽俗名水圪塔